

序文

附祝詞 祭文 輓詩

目錄

民報發刊詞

太平天國戰史序

三十三年落花夢序

建設雜誌發刊詞

心理建設自序

物質建設自序

社會建設自序

國家建設自序

中華民國憲法史前編序

黃花園七十二烈士事略序

蔣介石著孫大綱統廣州蒙難記序

戰後太平洋問題序

精武本紀序

余建光傳序

祝詞

民國八年國慶紀念詞

歡迎俄艦祝詞

祭文

祭黃花岡七十二烈士文

祭伍廷芳博士文

祭夏重民文

輓詩

輓劉道一詩

序文

民報發刊詞

近時雜誌之作者亦夥矣。矯詞以爲美。囂聽而無所終。擿植案塗。不獲則反覆其詞而自惑。求其斟酌時敵以立言。如古人所謂對症發藥者。已不可見。而況夫孤懷宏識。遠矚將來者乎。夫籍羣之道。與羣俱進。而擇別取舍。惟其最宜。此羣之歷史既與彼羣殊。則所以掖而進之之階級。亦無先後進止之別。由之不貳。此所以爲輿論之母也。予維歐美之進化。凡以三大主義。曰民族。曰民權。曰民生。羅馬之亡。民族主義興。而歐美各國以獨立。治自帝其國。盛行專制。在下者不堪其苦。則民權主義起。十八世紀之末。十九世紀之初。專制仆而立憲政體殖焉。世界開化。人智益蒸。物質發舒。百年銳於千載。經濟問題。繼政治問題之後。則民生主義。躍躍然動。二十世紀不得不爲民生主義之壇場時代也。是三大主義。皆基本於民。遞嬗變易。而歐美之人種胥治化焉。其他施維於小己大羣之間。而成爲故說者。皆此三者之充滿發揮而旁及者耳。今者中國以千年專制之毒而不解。異種殘之。外邦逼之。民族主義。民權主義。殆不可以須臾緩。而民生主義歐美所虛積重難返者。中國獨受病未深而去之易。是故或於人爲既往之陳迹。或於我爲方來之大患。要爲繕吾羣所有事。則不可不并時而弛張之。嗟夫。所陟卑者其所視不遠。游五都之市。見美服而求之。忘其身之未稱也。又但以當前者爲至美。近時志士。舌敝唇枯。惟企強中國以比

歐美。然而歐美強矣。其民實困。觀大同罷工與無政府黨社會黨之日熾。社會革命其將不遠。吾國縱能婉迹歐美。猶不能免於第二次之革命。而况追逐於人已然之末軌者之終無成耶。夫歐美社會之禍伏之數十年。及今而後發見之。又不能使之遽去。吾國治民生主義者。發達最先。視其禍害於未萌。誠可舉政治革命。社會革命。畢其功於一役。還視歐美。彼且噬乎後也。翳我祖國。以最大之民族。聰明強力。超絕等倫。而沈夢不起。萬事墮壞。幸爲風潮所激。醒其渴睡。且夕羣之間。奮發振強。勵精不已。則事半功倍。良非誇變。惟夫一羣之中。有少數最良之心理。能策其羣而進之。使最宜之治法。適應於吾羣。吾羣之進步。適應於世界。此先知先覺之天職。而吾民報所爲作也。抑非常革新之學說。其理想輸灌於人心。而化爲常識。則其去實行也近。吾於民報之出世觀之。

太平天國戰史序

朱元璋洪秀全各起自布衣。提三尺劍。驅逐異胡。師位於南京。朱明不數年。奄有漢家故土。傳世數百。而皇祀忽衰。洪朝不十餘年。及身而亡。無識者特唱種種謬說。是朱非洪。是蓋以成敗論豪傑也。胡元亡漢運不及百年。去古未遠。衣冠制度。仍用漢官儀。加以當時士君子。半師承趙江漢劉因諸賢學說。華夏之辨。多能道者。故李思齊擁兵不出。劉基徐達常遇春胡深諸人。皆徒步從明祖。羣起亡胡。則大事易舉也。滿清竊國二百餘年。明遺老之流風遺韻。蕩然無存。士大夫又久處異族籠絡壓抑之下。習與相忘。廉恥道喪。莫此爲甚。雖以羅會劉郭。號稱學者。終不明春秋大義。日陷於以漢攻漢之策。太平天國

遂底於亡。豈天未厭胡運歟。抑漢子孫不肖歟。其當時戰略失宜。有以致之歟。洪朝立國。距今四十年。一代典章偉蹟。概付焚如。卽洪門子弟。亦不詳其實質。是可嘆也。漢公搜輯東南太平遺書。不下數十種。凡遺世見聞。可記者錄之。題曰太平天國戰史。洵洪朝十三年一代信史也。太平一朝。與戰相終始。其他文藝官制諸典不能蔚然成帙。然近時僞本流行。關於太平戰蹟。每多隱諱。漢公是篇。可謂揭皇漢之武功。舉從前穢史一澄清之。俾讀者識太平朝之所以異於朱明。漢家謀恢復者。不可謂無人。洪門子弟。手此一篇。亦足徵高曾矩矱之遺。當世守其志而勿替。予亦有光榮焉。

三十三年落花夢序

世傳隋時有東海使客號虬髯公者。嘗遊中華。偏訪豪傑。遇李靖於靈石。識世民於太原。相與談天下事。許世民爲天下之資。助靖助之。以建大業。後世民起義師。除隋亂。果與唐室。稱爲太宗。說者謂初多使客之功。有以成其志云。宮崎寅藏君者。今之俠客也。識見高遠。抱負不凡。具懷仁慕義之心。發拯危扶傾之志。日憂黃種陵夷。憫支那削弱。數遊漢土。以訪英賢。欲共建不世之奇勳。襄成興亞之大業。聞吾人有再造支那之謀。創興共和之舉。不遠千里。相來訂交。期許甚深。勸勵極摯。方之虬髯。誠有過之。惟愧吾人無太宗之資。乏衛公之略。馳驅數載。一事無成。實多負君之厚望也。吾近以倦遊歸國。將其所歷。筆之於書。以爲關心亞局興衰籌保黃種生存者。有所取資焉。吾喜其用意之良。爲心之苦。特序此以表揚之。壬寅八月。支那孫文逸仙拜序。

建設雜誌發刊辭

我中華民國。以世界至大之民族。而擁有世界至大之富源。曾感受世界最進化之潮流。已舉行現代最文明之革命。遂使數千年一脈相傳之專制。爲之推翻。有史以來未有之民國爲之成立。然而八年以來。國際地位。猶未能與列強並駕。而國內則猶是官僚舞弊。武人專橫。政客搆亂。人民流離者。何也。以革命破壞之後而不能建設也。所以不能者。以不知其道也。吾黨同志。有見及此。故發刊建設雜誌。以鼓吹建設之思潮。闡明建設之原理。冀廣傳吾黨建設之主義。成爲國民之常識。使人人知建設爲今日之需要。便人人知建設爲易行之功。由是萬衆一心以赴之。而建設一世界最富強最快樂之國家。爲民所有。爲民所治。爲民所享者。此建設雜誌之目的也。茲當發刊之始。予樂而爲之祝曰。建設成功。中華民國之建設迅速成功。民國八年八月一日孫文。

心理建設自序

文奔走國事三十餘年。畢生學力盡萃於斯。精誠無間。百折不回。滿清之威力所不能屈。窮途之困苦所不能撓。吾志所向。一往無前。愈挫愈奮。再接再勵。用能鼓動風潮。造成時勢。卒賴全國人心之傾向。仁人志士之贊襄。乃得推翻專制。創建共和。本可從此繼進。實行革命黨所抱持之三民主義。五權憲法。與夫革命方略所規定之種種建設宏模。則必能乘時一躍而登中國於富強之域。躋斯民於安樂之天也。不圖革命初成。黨人即起異議。謂予主張者理想太高。不適中國之用。衆口鑠金。一時風靡。同志之士。亦悉惑焉。是以

予爲民國總統時之主張。反不若爲革命領袖時之有見而見之施行矣。此革命之建設所以無成。而破壞之後。國事更因之以日非也。夫去一滿洲之專制。轉生出無數強盜之專制。其爲毒之烈。較前尤甚。於是而民愈不聊生矣。溯夫吾黨革命之初心。本以救國救種爲志。欲出斯民於水火之中。而登之衽席之上也。今乃反令之陷水益深。蹈火益熱。與革命初衷大相違背者。此固予之德薄無以化格同儕。予之能鮮不足駕馭羣衆。有以致之也。然而吾黨之士。於革命宗旨。革命方略。亦難免有信仰不篤。奉行不力之咎也。而其所以然者。非盡關乎功成利達而移心。實以多思想錯誤而懈志也。此思想之錯誤爲何。卽知之非艱行之惟艱之說也。此說始於傳說對武丁之言。由是數千年來。深中於中國之人心。已成牢不可破矣。故予之建設計畫。一一皆爲此說所打銷也。嗚呼。此說者。予生平之最大敵也。其威力當萬倍於滿清。夫滿清之威力。不過祇能殺吾人之身耳。而不能奪吾人之志也。乃此敵之威力。則不惟能奪吾人之志。且足以迷惑兆人之心也。是故當滿清之世。予之主張革命也。猶能日起有功。進行不已。惟自民國成立之日。則予之主張建設。反致半籌莫展。一敗塗地。吾三十年來精誠無間之心。幾爲吾冰銷瓦解。百折不回之志。幾爲之槁木死灰者。此也。可畏哉此敵。可恨哉此敵。兵法有云。攻心爲上。是吾黨之建國計畫。卽受此心中之打擊者也。夫國者人之積也。人者心之器也。而國事者。一人羣心理之現象也。是故政治之隆污。係乎人心之振靡。吾心信其可行。則移山填海之難。終有成功之日。吾心信其不可行。則反掌折枝之易。亦無收效之期也。心之爲用大矣哉。夫心也者。萬事之本源也。滿清之顛覆者。此心成之也。民國之建設者。此心敗之也。夫革命黨之心理。於

成功之始。則被知之非艱行之惟難之說所奴。而視吾策爲空言。遂放棄建設之責任。如是則以後之建設責任。非革命黨所得而專也。迨夫民國成立之後。則建設之責任。當爲國民所共負矣。然七年以來。猶未覩建設事業之運行。而國事則日形糾紛。人民則日增痛苦。午夜思維。不勝痛心疾首。夫民國之建設事業。實不容一刻視爲緩圖者也。國民國民。究成何心。不能乎。不行乎。不知乎。吾知其非不能也。不行也。亦非不行也。不知也。僅能知之。則建設事業。亦不過如反掌折枝耳。回顧當年。予所耳提面命而傳授於革命黨員。而被河漢爲理想空言者。至今觀之。適爲世界潮流之需要。而亦當爲民國建設之資材也。乃擬筆之於書。名曰建國方略。以爲國民所取法焉。然尙有躊躇審顧者。則恐今日國人社會心理。猶是七年前之黨人社會心理也。依然有此知之非艱行之惟難之大敵橫梗於其中。則其以吾之計畫爲理想空言而自拒也。亦若是而已矣。故先作學說。以破此心理之大敵。而出國人之思想於迷津。庶幾吾之建國方略。或不致再被國人視爲理想空談也。夫如是。乃能萬衆一心。急起直追。以我五千年文明優秀之民族。應世界之潮流。而建設一政治最修明。人民最安樂之國家。爲民所有。爲民所治。爲民所享者也。則其成功必較革命之破壞事業爲尤速尤易也。時民國七年十二月三十日。孫文自序於上海。

物質建設

歐戰甫完之夕。作者始從事於研究國際共同發展中國實業。而成此六種計畫。蓋欲利用戰時宏大規模之機器。及完全組織之人工。以助長中國實業之發達。而成我國民一突飛之進

步。且以助各國戰後工人問題之解決。無如各國人民久苦戰爭。朝聞和議。夕則懈志。立欲復戰前原狀。不獨戰地兵員陸續解散。而後路工廠亦同時休息。大勢所趨。無可如何。故雖有三數之明達政治家贊成吾之計畫。亦無從保留其戰時之工業。以爲中國效勞也。我固失一速進之良機。而彼則竟陷於經濟之恐慌。至今未已。其所受痛苦。較之戰時尤甚。將來各國欲恢復其戰前經濟之原狀。尤非發展中國之富源。以補救各國之窮困不可也。然則中國富源之發展。已成爲今日世界人類之至大問題。不獨爲中國之利害而已也。惟發展之權。操之在我則存。操之在人則亡。此後中國存亡之關鍵。則在此實業發展之一事也。吾欲操此發展之權。則非有此智識不可。吾國人欲有此智識。則當讀此書。尤當熟讀此書。從此觸類旁通。舉一反三。以推求衆理。庶幾操縱在我。不致因噎廢食。方能泛應曲當。馳驟於今日世界經濟之場。以化彼族競爭之性。而達我大同之治也。

此書爲實業計畫之大方針。爲國家經濟之大政策而已。至其實施之細密計畫。必當再經一度專門名家之調查。科學實驗之審定。乃可從事。故所舉之計畫。當有種種之變更改良。讀者幸毋以此書爲一成不易之論。庶乎可。

此書原稿爲英文。其篇首及第二第三計畫。及第四之大部分。爲朱執信所譯。其第一計畫。爲廖仲愷所譯。其第四之一部分。及第六計畫。及結論。爲林雲陔所譯。其第五計畫。爲馬君武所譯。特此誌之。民國十年十月十日。孫文序於粵京。

社會建設自序

中華民族。世界之至大者也。亦世界之至優者也。中華土地。世界之至廣者也。亦世界之

至富者也。然而以此至大至優之民族。據此至廣至富之土地。會此世運進化之時。人生發達之際。猶未能先我東隣而改造一富強之國家者。其故何也。人心渙散。民力不凝結也。中國四萬萬之衆。等於一盤散沙。此豈天生而然耶。實異族之專制有以致之也。在滿清之世。集會有禁。文字成獄。偶語棄市。是人民之集會自由。出版自由。思想自由皆以削奪淨盡。至二百六十年之久。種族不至滅絕。亦云幸矣。豈復能期其人心固結。羣力發揚耶。

乃天不棄此優秀衆大之民族。其始也。得歐風美雨之吹沐。其繼也得東鄰維新之喚起。其終也。得革命風潮之震蕩。遂一舉而推覆異族之專制。光復祖宗之故業。又能循世界進化之潮流。而創立中華民國。無如國體初建。民權未張。是以野心家竟欲覆民政而復帝制。民國五年。已變爲洪憲元年矣。所幸革命之元氣未銷。新舊兩派皆爭相反對帝制自爲者。而民國乃得中興。今後民國前途之安危若何。則全視民權之發達如何耳。

何爲民國。美國總統林肯氏有言曰。民之所有。民之所治。民之所享。此之謂民國也。何謂民權。卽近來瑞士國所行之制。民有選舉官吏之權。民有罷免官吏之權。民有創制法案之權。民有複決法案之權。此之謂四大民權也。必具有此四大民權。方得謂爲純粹之民國也。革命黨之誓約曰。恢復中華。創立民國。蓋欲以此世界至大至優之民族。而造一世界至進步。至莊嚴至富強至安樂之國家。而爲民所有。爲民所治。爲民所享者也。

今民國之名已定矣。名正則言順。言順則事成。而革命之功亦以之而畢矣。此後顧名思義。循名課實。以完成革命志士之志。而造成一純粹民國者。則國民之責也。蓋國民爲一國

之主。爲統治權之所出。而實行其權者。則發端於選舉代議士。僅能按部就班。以漸而進。由幼稚而強壯。民權發達。則純粹之民國可指日而得也。

民權何由而發達。則從固結人心。糾合羣力始。而欲固結人心。糾合羣力。又非從集會不爲功。是集會者。實爲民權發達之第一步。然中國人受集會之厲禁數百年於茲。合羣之天性殆失。是以集會之原則。集會之條理。集會之習慣。集會之經驗。皆闕然無有。以一盤散沙之民衆。忽而登彼於民國主人之位。宜乎其手足無措。不知所從。所謂集會。則烏合而已。是中國之國民。今日實未能行民權之第一步也。

然則何爲而可。吾知野心家必曰。非帝政不可。曲學者必曰。非專制不可。不知國猶人也。人之初生。不能一日而舉步。而國之初造。豈能一時而突飛。孩提之學步也。必有保母教之。今國民之學步。亦當如是。此『民權初步』一書之所由作。而以教國民行民權之第一步也。

自西學之東來也。玄妙如宗教哲學。奧衍如天算理化。資治如政治經濟。實用如農工商兵。博雅如歷史文藝。無不各有專書。而獨於淺近需要之議學。則尙闕如。誠爲吾國人羣社會之一大缺憾也。夫議事之學。西人童而習之。至中學程度。則已成爲第二之天性矣。所以西人合羣團體之力。常超吾人之上也。

西國議學之書。不知其幾千百家也。而其流行常見者。亦不下百數十種。然皆陳陳相因。大同小異。此書所取材者。不過數種。而尤以沙德氏之書爲最多。以其顯淺易明。便於初學。而適於吾國人也。此書條分縷析。應有盡有。已全括議學之妙用矣。自合議制度始於

英國。而流布於美歐各國。以至於今。數百年來之經驗習慣。可於此書一朝而得之矣。此書譬之兵家之操典。化學之公式。非流覽誦讀之書。乃習練演試之書也。若以流覽誦讀而治此書。則必味如嚼蠟。終無所得。若以習練演試而治此書。則將如嚼蔗漸入佳境。一旦貫通。則會議之妙用。可全然領略矣。

凡欲負國民之責任者。不可不習此書。凡欲固結吾國之人心。糾合吾國之民力者。不可不熟習此書。而徧傳之於國人。使成爲一普通之常識。家族也社會也學堂也農團也工黨也商會也公司也國會也省會也縣會也國務會議也軍事會議也。皆當以此爲法則。

此書爲教吾國人行民權第一步之方法也。儼此第一步能行。行之能穩。則逐步前進民權之發達。必有登峯造極之一日。語曰『行遠自邇。登高自卑』。吾國人既知民權爲人類進化之極則。而民國爲世界最高尚之國體。而定之以爲制度矣。則行第一步之工夫。萬不可忽略也。苟人人熟習此書。則人心自結。民力自固。如是以我四萬萬衆優秀文明之民族。而握有世界最良美之土地。最博大之富源。若一心一德以圖富強。吾決十年之後。必能駕歐美而上之也。四萬萬同胞行哉勉之。民國六年二月二十一日孫文序於上海

國家建設自序

自建國方略之心理建設。物質建設。社會建設。三書出版之後。予乃從事於草作國家建設。以完成此帙。國家建設一書。較前三書爲獨大。內含有民族主義。民權主義。民生主義。五權憲法。地方政府。中央政府。外交政策。國防計畫八冊。而民族主義一冊。已經脫

稿。民權主義。民生主義。二冊亦草就大部。其他各冊。於思想之線索。研究之門徑。亦大略規畫就緒。俟有餘暇。便可執筆直書。無待思索。方擬全書告竣。乃出而問世。不期十一年六月十六。陳炯明叛變。砲擊觀音山。竟將數年心血所成之各種草稿。並備參考之西籍數百種。悉被燬去。殊可痛恨。茲值國民黨改組。同志決心從事攻心之奮鬥。亟需三民主義之奧義。五權憲法之要旨。爲宣傳之資。故於每星期演講一次。由黃昌穀君筆記之。由鄒魯君讀校之。今民族主義適已講完。特先印單行本以餉同志。惟此次演講既無暇晷。以預備。又無書籍爲參考。祇於登壇之後隨意發言。較之前稿。遺忘實多。雖於付梓之先。復加刪補。然於本題之精義。與敘論之條理。及印證之事實。都覺遠不如前。尙望同志讀者。本此基礎。觸類引伸。匡補闕遺。更正條理。使成爲一完全之書。以作宣傳之課本。則其造福於吾民族吾國家。誠未可限量也。民國十三年三月三十日。孫文序於廣州大本營。

中華民國憲法史前編序

憲法者。國家之構成法。亦即人民權利之保障書也。四千年之帝制。易爲民主。於是中華民國出現於世界。民國約法。亦同時產生。此四萬萬人民公意之表示也。是故袁世凱以洪憲奸之於前而不可。張勳以復辟亂之於後而輒敗。實物之教訓。亦可以戢奸雄之野心。而正邪辟之亂萌矣。惟約法以憲法制定之權。委諸國會。國會制憲。乃久而無成。論者或以爲口實。然考其經過。則妨害擾亂。使憲法不能厥告成功者。皆爲不利有憲法之人。其人

即假借武力。敢爲國民之公敵者也。不是之咎。而咎國會。何其妄耶。

吳君宗慈編民國憲法史前編既成。屬一言以爲序。夫民國九年。人民求憲法而不見。今見此書其感慨覺悟爲何似。抑吾人懷苟且羣衆無門之戒。既以護法爲職志。則惟有努力奮鬥。期必達目的而後止。吾知中華民國憲法。必有正式宣告於海內外之一日。吳君其泚筆續記之。中華民國九年八月。孫文。

黃花岡七十二烈士事略序

滿清末造。革命黨人。歷艱難險巇。以堅毅不撓之精神。與民賊相搏。蹈路者屢。死事之慘。以辛亥三月二十九日圍攻兩廣督署之役爲最。吾黨善華付之一炬。其損失可謂大矣。然是役也。碧血橫飛。浩飛四塞。草木爲之含悲。風雲因而變色。全國久熱之人心。乃大興奮。怨憤所積。如怒濤排壑不可遏抑。不半載而武昌之大革命以成。則斯役之價值。直可驚天地泣鬼神。與武昌革命之役並壽。顧自民國肇造。變亂紛乘。黃花岡上一抔土。猶湮沒於荒烟蔓草間。延至七年。始有莫惕之建修。十年始有事略之編纂。而七十二烈士者。又或有紀載。而語焉不詳。或僅存姓名而無事蹟。甚者且姓名不可考。如史載出橫事。雖以史遷之善傳游俠。亦不能爲五百人立傳。滋可痛已。鄒君海濱。以所輯黃花岡烈士事略。乞序於予。時予方以討賊督師桂林。環顧國內賊氛方熾。机旆之象。視前季有加。而予三十年前所主唱之三民主義。五權憲法。爲諸先烈所不惜犧牲生命以爭之者。其不獲實行也如故。則予此行所負之責任。尤倍重於三十年前。倘國人皆以諸先烈之犧牲精神爲國

奮鬥。助予完成此重大之責任。實現吾人理想之真正中華民國。則此一部開國血史。可傳世而不朽。否則不能繼述先烈遺志且光大之。而徒感慨於其遺事。斯誠後死者之羞也。余爲斯序。既痛逝者。并以爲國人之讀茲編者勗。中華民國十年十二月日孫文。

蔣介石著孫大總統廣州蒙難記序

陳逆之變。介石赴難來粵。入繼日侍余側。而籌策多中。樂與予及海軍將士共生死。茲記殆爲實錄。亦直其瑣瑣大者。其詳乃未遑更僕數。予非有取於其溢詞。僅冀掬誠與國人相見而已。予乏知人之鑒。不及豫寢逆謀。而卒以長亂貽禍。賦箴至今爲烈。則茲編之紀。亦聊以志吾過。且以矜吾海軍及北伐軍諸將士之能爲國不顧其私。其視於世功罪何如也。民國十一年雙十節。孫文序於上海。

戰後太平洋問題序

何謂太平洋問題。卽世界之海權問題也。海權之競爭。由地中海而移於大西洋。今後則由大西洋而移於太平洋矣。昔時之地中海問題。大西洋問題。我可付諸不知不問也。惟今後之太平洋問題。則實關於我中華民族之生存。中華國家之運命者也。蓋太平洋之重心卽中國也。爭太平洋之海權。卽爭中國之門戶權耳。誰握此門戶。則有此堂奧。有此寶藏也。人力以我爲爭。我豈能付之不知不問乎。姚伯麟先生有鑒於此。特著「戰後太平洋問題」一書。以喚起國人之迷夢。俾國人知所遠慮。以免近憂焉。其救國之苦心。良足多也。故

喜而爲之序。中華民國八年九月。孫文。

精武本紀序

自人類日進於文明。能以種種經驗資用器具而抵抗自然。至於今日。人智所發明者。幾爲古人夢想擬議所不到。蓋云盛矣。然以利用種種器具之後。漸舉其本體器官固有之作用。循用進廢退之公例而不免於淘汰。此近來有識者所深憂也。

慨自火器輸入中國之後。國人多棄體育之技擊而不講。馴至社會個人積弱愈甚。不知最後五分鐘之決勝。常在面前五尺地短兵相據之時。爲今次歐戰所屢見者。則謂技擊術與鎗砲飛機有同等作用。亦奚不可。而我國人曩昔僅襲得他人物質文明之粗末。遂自棄其本體固有之技能以爲無用。豈非大失計耶。

我國民族。平和之民族也。吾人初不以黷武善戰策我同胞。然處競爭劇烈之時代。不知求自衛之道。則不適於生存且吾觀近代戰爭之起。恆以弱國爲問題。倘以平和之民族。善於自衛。則斯世初無弱肉強食之說。而自國之問題不待他人之解決。因以促進世界人類之平和。我民族之責任。不綦大哉。易曰。『設藏誨盜。治容誨淫』。孟子曰。『人必自侮。而後人侮之。國必自伐。而後人伐之』。此皆爲不知自衛者警也。

精武體育會成立既十年。其成績甚多。識者稱爲體魄修養術專門研究之學會。蓋以振起從來體育之技擊術爲務。於強種保國有莫大之關係。推而言之。則吾民族所以致力於世界平和之一基礎。會中諸子。爲精武本紀既成。索序於余。余嘉諸子之有先知毅力。不同於流

俗也。故書此與之。中華民國八年十月二十日。

余健光傳序

健光之死也。民黨知與不知。皆爲嘆傷。以謂使天假之年。獲竟其志。其所造當什百倍於今日也。惟健光則固以奮鬥而死。自有志於革命以來。眞所謂一息尚存。未嘗少懈者。其生平自揆。亦曾無成敗利鈍之見。故不問健光所已建樹於國家社會者奚若。而卽此奮鬥進取之精神。已足以移傳於多數後起之青年而不朽。我知健光無復遺憾矣。健光與同志助英士數年。英士多病。健光獨強健年少。顧英士不死於病而死於敵。健光不死於敵而死於病。均出常人預測之外。然努力於其所職志。終以生命爲犧牲。則其死一也。因覽漢民所爲健光傳。爰書數語以示吾黨。民國九年。五月九日。孫文識於上海。

祝詞

民國八年國慶紀念詞

今日何日。乃革命黨員熊秉坤開槍發難。清朝協統黎元洪被迫效順而起革命軍於武昌之日也。隨而馮國璋焚燒漢口。隨而袁世凱病起彰德。皆欲效忠異族。殘殺同胞。而勦滅革命軍者也。無如黨人徧布國中。響應四起。遂致清朝江山。不可收拾。於是而南北和議之局開。於是而非袁莫屬之論起。時予方在倫敦。從事於外交問題之解決。正當著著得手。舉